

KOULEN MWAHNAKAPW SILIMENO

Oaralap en Pwuhk wet

En Asaraia eh Kapakap oh Koulen Mwahtnakapw Silimeno iei ehu ire kesempwal me kapatapatohng *Pwuken Daniel* ni mahsen en Krihs. Ire pwukat mi nanpwungen 3.23 oh 3.24 en *Pwuken Daniel* kasalehda kapakap en Asaraia oh koulen mwahtnakapw silimeno mwurin Nanmwarki Nepukadnesar eh keseirailong nan uhmw mwehl ehu.

Audepe ni Oaralap

En Asaraia eh kapakap 1-22

Koasoiepen uhmw mwehlo 23-27

Koulen mwahtnakapw silimeno 28-68

En Asaraia Eh Kapakap

¹ Mwahtnakapw silimeno, Ananaia, Misael, oh Asaraia^a eri tapihada alialuseli nan kisinieio, wiewia koulen kaping ong Koht, oh kapikapinga nin duwen Kaun lapalap.

² Asaraia eri uhdi nan kisinieio oh kapakap ni ngihl laud ni duwe met: ³ “Maing at Kaun, Koht en at pahpa kahlap ako, se kin kapinga oh pwongih komwi; mwaromwi en waunla kohkohlahte. ⁴ Komwi ketin wiahiongkitech dahme se warohng ale. Mehkoaros me komwi kin ketin wiahiong kiht me pwung ahnsou koaros, oh ni omwi kin ketin kadeingkitada, komwi kin ketin sapwellimaniki pwuhng pahrek ahnsou koaros. ⁵ Komwi me pwung ni omwi ketikidohng kahpwal pohn Serusalem, kahnimw sarawien at pahpa kahlap ako. Se warohng ale lokolok pwuko pwehki dipat akan. ⁶ Se sapeikiong komwi, se

^a 1:1: ANANAIA, MISAEAL, ASARAIA: Mwar pwukat iei uhdahn mwaren Sadrak, Mesak, oh Apedneko. (Tehk Dan. 1.6-7.) 1:1: Dan. 3.23.

sohpeisang komwi, oh se dipikidahr dihp koaros. ⁷ Se sohte kapwaiada mehkan me komwi ketin koasoanediong kiht se en wia. Ma se peikiong sapwellimomwi kosonned kan, se pahn paiamwahula, ⁸ ahpw met se warohng ale kadeik oh lokolok me komwi ketikidohng kiht. ⁹ Komwi ketin mweidala se en lohdi pahn manaman en aramas suwed kan, me lemei, oh imwintihti kahngohdi kei — pahn manaman en nanmwarki men me keieu suwed nin sampah. ¹⁰ Eri met, kiht koaros me kin patohwan pwongih komwi, se mwamwahllahr; se inenen nameneklahr oh solahr kak lokaia.

¹¹ “Se patohwan peki komwi en dehr likidmelieikitala kokkohlahte pwehki mwaromwi sarawi, komwi dehr pil ketin kauwehla sapwellimomwi inou. ¹² Komwi dehr pil ketin katokihedi sapwellimomwi kupwurkalahngan ong kiht. Komwi ketin kapwaiada sapwellimomwi inou ong Eipraam, me komwi ketin poakohng, ong Aisek, sapwellimomwi ladu, oh ong Seikop, semen sapwellimomwi aramas en Israel kan. ¹³ Komwi ketin inoukihong irail me komwi pahn kahngederehla kadaudokarail kan rasehng usu kan pahnlahng de pihk en ni oaroahr kan. ¹⁴ Ahpw met, Maing at Kaun, se patohwan malaulausangehr tohn wehi koaros; wasa koaros me se mihmi ie, se kin namenek pwehki dipat akan. ¹⁵ Solahr at nanmwarki, solahr at tungoal soukohp, solahr at kaun emen. Solahr at tungoal Tehnpas Sarawi, wasa se kak wia ie at tungoal meirong isih kan, de patohwanda ie at tungoal kisakis kan, at meirong teikan, de warpwohmwahu kan; solahr wasa me se pahn wia ie at tungoal meirong kan oh ale sapwellimomwi kupwurkalahngan. ¹⁶ Eri, se patohdo pahn kupwuromwi ni at koluhlahr oh wiliakapwalahr nan kapehdet ni mehlel, oh pekipeki komwi en kupwurei kiht duwehte ma se patohwandahng komwi meirong isih en

sihpw wol kei oh kouwol kei oh sihpmpwul wih tohto. ¹⁷ Komwi ketin kupwure at koluhlahr me iei at meirong ong komwi rahnwet, pwe se en kak peikiong komwi nan at mohngiong unsek. Sohte emen me likih komwi pahn nsensuwedla. ¹⁸⁻¹⁹ Eri, met se inoukidahr nan kapehdet unsek me se pahn peikiong komwi, pwongih komwi, oh kapakap ong komwi. Komwi ketin kupwurkalahngan ong kiht oh kupwurei kiht, oh dehr mweidohng se en namenekla. ²⁰ Maing at Kaun, komwi ketin kapitkinkitala ehu sapwellimomwi wiewia kapwuriamwei kan; komwi ketin kawauwihala mwaromwi.

²¹ “Komwi ketin kasarowehdi oh kanamenekihala irail koaros me wiakauwehla sapwellimomwi ladu kan. Komwi ketikihsang ar kehl oh manaman oh kauwehla ar kehlail.

²² Re en esehla me komwihte me Kaun-o oh Koht me komwi kin ketin kakaun sampah pwon ni roson lapalap.”

²³ Eri, Sapwellimen nanmwarki ladu ko me kesehlong ohl silimeno nan kisinieio ahpw sasaunki kisinieio soangen oil ehu, tahr, tuwi, oh dihpw meng. ²⁴ Uwen ile en mpwulen kisinieio mihmi ni piht isihsek limau ²⁵ oh e pil kamwasikehla mehn Papilonia ko me kesikesihnen limwah. ²⁶ Tohnleng en Koht men ahpw ketidihdo nan kisinieio wasa me mwahnakapw silimeno wie kesikesihnen ieo. E sikenla mpwulen kisinieio ²⁷ oh kisinieng lemwulemwur ahpw lel irail, oh kisinieio sohte sair ohl ako de pil kauweiraila.

Koulen Mwahnakapw Silimeno

²⁸ Ohl silimeno ahpw tapihada wia koulen kaping pwoatet ong Koht nindokon ar mihmi nan kisinieio:

²⁹ “Maing at Kaun, Koht en at pahpa kahlap ako, se patohwan kapinga komwi.

- ³⁰ Sapwellimomwi mwar lingan oh sarawi
en waunla oh lemmwin kohkohahte.
- ³¹ Koul kan en kin wiewiawi ong mwaromwi lingan
kohkohahte
oh kapingpen omwi ketiket reht en wiawi nan tehn-
pas
- ³² me komwi kin ketiket ie, nan mwoalomwi pohn
kerup kan
oh mahsendidohng nan wasahn me melahr akan.
Wahupomwi oh kapingpomwi en wiewiawi
kohkohahte.
- ³³ Kaping en wiawi ong komwi ni omwi ketiket nan
mwoalen sapwellimomwi wehi.
Koul kan en kin wiawi ong mwaromwi lingan
kohkohahte.
- ³⁴ Kaping en wiawi ong komwi pohn pweleng en nanleng
kan.
Koul kan en kin wiawi ong mwaromwi lingan
kohkohahte.
- ³⁵ “Kumwail kapinga Kaun-o, kumwail koaros me wiepen
nin limen Kaun-o;
kumwail koulkihong koulén kaping oh wauneki
kohkohahte.
- ³⁶ Kumwail kapinga Kaun-o, kumwail pahnlahng kan;
kumwail koulkihong koulén kaping oh wauneki
kohkohahte.
- ³⁷ Kumwail kapinga Kaun-o, kumwail sapwellimen Kaun-
o tohnleng kan koaros;
kumwail koulkihong koulén kaping oh wauneki
kohkohahte.
- ³⁸ Kumwail kapinga Kaun-o, kumwail pihl kan koaros me
mi pohnangin pahnlahng;
kumwail koulkihong koulén kaping oh wauneki
kohkohahte.

- 39 Kumwail kapinga Kaun-o, kumwail me manaman
koaros en nanleng;
kumwail koulkihong koulén kaping oh wauneki
kohkohahte.
- 40 Kumwa kapinga Kaun-o, kumwa ketipin oh maram;
kumwa koulkihong koulén kaping oh wauneki
kohkohahte.
- 41 Kumwail kapinga Kaun-o, kumwail usu kan en nanleng;
kumwail koulkihong koulén kaping oh wauneki
kohkohahte.
- 42 Kumwa kapinga Kaun-o, kumwa keteu oh pwoaik;
kumwa koulkihong koulén kaping oh wauneki
kohkohahte.
- 43 Kumwail kapinga Kaun-o, kumwail kisinieng kan;
kumwail koulkihong koulén kaping oh wauneki
kohkohahte.
- 44 Kumwa kapinga Kaun-o, kumwa kisiniei oh karakar;
kumwa koulkihong koulén kaping oh wauneki
kohkohahte.
- 45 Kumwail kapinga Kaun-o, kumwail ahnsoun kopou laud
oh karakar laud kan;
kumwail koulkihong koulén kaping oh wauneki
kohkohahte.
- 46 Kumwail kapinga Kaun-o, kumwail pwoaik kan oh sinoh
kan;
kumwail koulkihong koulén kaping oh wauneki
kohkohahte.
- 47 Kumwail kapinga Kaun-o, kumwail pwohng kan oh rahn
akan;
kumwail koulkihong koulén kaping oh wauneki
kohkohahte.
- 48 Kumwa kapinga Kaun-o, kumwa marain en rahn oh
rotorot;
kumwa koulkihong koulén kaping oh wauneki
kohkohahte.

- 49 Kumwa kapinga Kaun-o, kumwa aihs oh kopou;
kumwa koulkihong koulén kaping oh wauneki
kohkohahte.
- 50 Kumwa kapinga Kaun-o, kumwa aihs oh sinoh;
kumwa koulkihong koulén kaping oh wauneki
kohkohahte.
- 51 Kumwail kapinga Kaun-o, kumwail lioal oh depwek en
melimel kan;
kumwail koulkihong koulén kaping oh wauneki
kohkohahte.
- 52 “Kapinga Kaun-o, kowe sampah;
koulkihong koulén kaping oh wauneki kohkohahte.
- 53 Kumwail kapinga Kaun-o, kumwail nahna kan oh dohl
kan;
kumwail koulkihong koulén kaping oh wauneki
kohkohahte.
- 54 Kumwail kapinga Kaun-o, kumwail koaros me kin
wosada;
kumwail koulkihong koulén kaping oh wauneki
kohkohahte.
- 55 Kumwail kapinga Kaun-o, kumwail leh kan oh pillap
akan;
kumwail koulkihong koulén kaping oh wauneki
kohkohahte.
- 56 Kumwail kapinga Kaun-o, kumwail utuhn pihl kan;
kumwail koulkihong koulén kaping oh wauneki
kohkohahte.
- 57 Kumwail kapinga Kaun-o, kumwail roahs kan oh aude-
pen nan madau kan;
kumwail koulkihong koulén kaping oh wauneki
kohkohahte.
- 58 Kumwail kapinga Kaun-o, kumwail menpihr kan
koaros;

kumwail koulkihong koulén kaping oh wauneki
kohkohahte.

⁵⁹ Kumwail kapinga Kaun-o, kumwail kou kan koaros oh
mahn lawalo koaros;
kumwail koulkihong koulén kaping oh wauneki
kohkohahte.

⁶⁰ “Kumwail kapinga Kaun-o, kumwail tohn sampah
koaros;
kumwail koulkihong koulén kaping oh wauneki
kohkohahte.

⁶¹ Kumwail kapinga Kaun-o, kumwail mehn Israel kan;
kumwail koulkihong koulén kaping oh wauneki
kohkohahte.

⁶² Kumwail kapinga Kaun-o, kumwail sapwellimen Kaun-
o samworo kan.
kumwail koulkihong koulén kaping oh wauneki
kohkohahte.

⁶³ Kumwail kapinga Kaun-o, kumwail sapwellimen Kaun-
o ladu kan;
kumwail koulkihong koulén kaping oh wauneki
kohkohahte.

⁶⁴ Kumwail kapinga Kaun-o, kumwail aramas loalopwoat
kan koaros;
kumwail koulkihong koulén kaping oh wauneki
kohkohahte.

⁶⁵ Kumwail kapinga Kaun-o, kumwail koaros me sarawi oh
mpahi;
kumwail koulkihong koulén kaping oh wauneki
kohkohahte.

⁶⁶ Kumwail kapinga Kaun-o, kumwail Ananaia, Asaraia, oh
Misaël;
kumwail koulkihong koulén kaping oh wauneki
kohkohahte.

E ketin kapitkitailsang nan wasahn me melahr akan

oh doareiketailsang pahn manaman en mehla.
E ketikinkitailieisang nan uhmw mwehlo
oh doareiketailsang nan kisinieio.

⁶⁷ Kumwail kapingkalahngan ong Kaun-o, pwe ih me ketin
kupwur mwahu
oh sapwellime kalahngan kin poatopoaat.

⁶⁸ Kumwail kapinga Kaun-o, kumwail koaros me kin
pwohngih;
kumwail kapinga Koht en koht akan oh kapingkalah-
ngan ong ih,
pwe sapwellime kalahngan me poatopoaat.”

Pohnpeian Bible with Apocrypha
The Holy Bible in the Pohnpeian language of the Federated States of
Micronesia

copyright © 2006 Bible Society of the South Pacific

Language: Pohnpeian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-09-08

PDF generated using Haiola and XeLaTeX on 13 Mar 2019 from source files dated 13 Mar 2019

7ff9a0a6-6024-5540-a190-762a68918ebc